



**BOSNA I HERCEGOVINA  
PARLAMENTARNA SKUPŠTINA  
BOSNE I HERCEGOVINE  
DOM NARODA**

- Komisija za vanjsku i trgovinsku politiku –

Broj: 02/2-50-1-9-15-11/04

Sarajevo, 26. 02. 2004. godine

**Z A P I S N I K**

**sa 15. sjednice Komisije za vanjsku i trgovinsku politiku  
Doma naroda Parlamentarne skupštine BiH  
održane 16. 02. 2004. godine**

Petnaestu sjednicu Komisije za vanjsku i trgovinsku politiku Doma naroda Parlamentarne skupštine Bosne i Hercegovine sazvaio je predsjedavajući Komisije Hasan Čengić.

Sjednici su prisustvovali sljedeći članovi Komisije: Hasan Čengić, Anto Spajić, Vinko Radovanović, Osman Brka, i Nade Radović, kao i Nevenka Savić, sekretar Komisije. Velimir Jukić bio je opravdano odsutan.

Osim navedenih, sjednici su prisustvovali iz Ministarstva vanjske trgovine i ekonomskih odnosa: Enver Muratović, šef Odsjeka za vanjskotrgovinsku politiku, Čedo Ljuboja, šef Odsjeka za carinsku tarifu i Mario Perc, stručni saradnik; Nihad Fejzić, zamjenik direktora Ureda za veterinarstvo; Mitar Pavić, rukovodilac Odjela za međunarodno pravne poslove u Ministarstvu vanjskih poslova BiH, Mladen Vasić, savjetnik ministra u Ministarstvu poljoprivrede, vodoprivrede i šumarstva Federacije BiH; Mirsad Salkić, zamjenik predsjedavajućeg Državne regulatorne komisije za električnu energiju, Gligorić Ljuban, savjetnik u “Mlijeko produktu” iz Kozarske Dubice; Marjan Vučak, predsjednik Uprave “Meggle” d.o.o. Bihać; Željko Marijan, direktor “Lura” mljekare Livno i Nurudin Peštalić, vlasnik “INMER” mljekare Gradačac, kao i predstavnici sredstava javnog informiranja.

Sjednicom je predsjedavao predsjedavajući Komisije Hasan Čengić. Nakon što je konstatirao da postoji kvorum, predsjedavajući Komisije je predložio sljedeći

## DNEVNI RED

1. Mogućnosti proizvodnje mlijeka u Bosni i Hercegovini i problemi u vezi sa poticajima i uvozno-izvoznim režimom;
2. Usvajanje Zapisnika sa 14. sjednice Komisije;
3. Saglasnost za ratifikaciju Dodatnog protokola Konvencije protiv dopinga, Varšava 12. septembar 2002. godine - predlagač Predsjedništvo BiH;
4. Saglasnost za ratifikaciju Dodatnog memoranduma o razumjevanju između Evropske zajednice i Bosne i Hercegovine - predlagač Predsjedništvo BiH;
5. Izvještaj o radu Državne regulatorne komisije za električnu energiju BiH u 2003. godini;
6. Tekuća pitanja.

Dnevni red je jednoglasno usvojen.

### **Ad. 1. Mogućnosti proizvodnje mlijeka u Bosni i Hercegovini i problemi u vezi sa poticajima i uvozno-izvoznim režimom**

Uvodno izlaganje o ovoj temi podnio je predsjedavajući Komisije Hasan Čengić. On je objasnio da tema zaslužuje veliku pažnju nadležnih institucija, a članovi Komisije su jedinstveno prihvatili ideju da se o ovome razgovara, jer smatraju da Komisija u okviru svojih nadležnosti i Dom naroda mogu aktivno učestvovati u rješavanju problema u ovoj oblasti. Tema je interesantna i sa stanovišta pristupanja Bosne i Hercegovine Svjetskoj trgovinskoj organizaciji u ovoj godini, a i sa stanovišta položaja poljoprivrede kao privredne grane u procesu pristupanja Evropskoj uniji. Proizvodnja mlijeka predstavlja barometar stanja u poljoprivredi bilo koje zemlje, ona dotiče svako domaćinstvo u zemlji, bilo kao proizvođača ili kao potrošača, a ogledalo je odnosa vlasti prema domaćim resursima. Predsjedavajući je naglasio datrenutno na nivou Bosne i Hercegovine nema zakona o poljoprivredi, ni strategije razvoja poljoprivredne proizvodnje. On je iznio i nekoliko značajnih podataka: u 2003. godini otkupljeno je 110 miliona litara mlijeka, dok je proizvodnja bila na nivou od oko 500 miliona litara. U BiH je uvezeno oko 120 miliona litara mlijeka. Mlijeko je otkupljivano od 28.000 zemljoradnika, pri tome je proizvodnja na velikim, državnim farmama opadala, a otkup se povećavao kod sitnijih poljoprivrednih proizvođača. Premije pri otkupu mlijeka različite su u entitetima. Otkup u BiH je ispod 20% od proizvodnje, ali to ne znači da tržište nije snabjeveno. Uvozi se uglavnom iz Slovenije i Hrvatske. Dakle, tržište postoji, šansa za domaće proizvođače postoji, postavlja se pitanje kako država može i treba regulirati, odnosno, poticati domaću proizvodnju.

G. Vasić je rekao da će ove godine u Federaciji biti otkupljeno 58 miliona litara mlijeka, te da je proizvodnja prešla 3 hiljade litara po kravi. Najveći problemi su usitnjenost farmera, njihova neorganiziranost, nedostatak stručnog kadra, nepostojanje strategije razvoja. Zakon o poljoprivredi Federacije BiH, po riječima g. Vasića, je u završnoj fazi pripreme, treba ga usvojiti i što je najvažnije primjenjivati. Govoreći o poticajima za poljoprivrednu proizvodnju, naglasio je da je u Federaciji odobreno oko 10 miliona KM, ali nažalost, odluka za odobrenje sredstava stiže krajem trećeg kvartala, pa se sredstva ne upotrijebe do kraja. G. Vasić je na kraju rekao da je stav federalnih organa vlasti da je potrebno imati instituciju nadležnu za poljoprivredu na državnom nivou jer deset ministarstava na kantonalnom nivou, koja postoje u Federaciji u ovom momentu, nisu efikasna.

G. Muratović je u svom izlaganju govorio hronološki od momenta donošenja Zakona o vanjskotrgovinskoj politici 1998. godine, preko potpisivanja ugovora o slobodnoj trgovini sa susjednim zemljama, donošenja Zakona o fitosanitarnoj zaštiti i Zakona o carinskoj tarifi i o tome šta je svaki od pomenutih koraka imao za posljedicu.

G. Ljuboje je govorio o izradi novog Zakona o carinskoj tarifi uključujući i carinsku tarifu. Naglasio je da se traži veća zaštita proizvoda mliječnog porijekla, ali poredeći situaciju u susjednim zemljama može se konstatovati da je znatno veća zaštita tih proizvoda kod nas. Uvozni proizvodi su zaštićeniji od konkurencije kod nas nego u svojim zemljama i svako dalje povećanje carinske zaštite išlo bi u korist stranih proizvođača, tako da se ova naša carinska zaštita već pretvorila u svoju suprotnost.

G. Perc je govorio o problemu nepostojanja akreditiranih laboratorija u Bosni i Hercegovini, što onemogućava izvoz poljoprivrednih proizvoda.

G. Fejzić je prvo govorio o Uredu za veterinarstvo i Zakonu o veterinarstvu na državnom nivou. On je iznio podatak da BiH nema nijednu kompaniju registrovanu za izvoz u zemlje Evropske unije iz oblasti poljoprivredne proizvodnje. Istovremeno na našem tržištu se pojavljuju i robe proizvođača koji nisu registrovani. Ne postoji konzistentan mehanizam kontrole ulaska ovakvih proizvoda u zemlju.

U nastavku diskusije govorili su proizvođači i prerađivači mlijeka:

G. Gligorić je iznio u uvodu nekoliko podataka o svojoj firmi: "Mlijeko produkt" je najveća mljekara u BiH, koja je u prethodnoj godini otkupila i preradila 24 miliona litara mlijeka. Preko 3 miliona KM uloženo je u sirovinsku osnovu preko kreditnih sredstava dobavljačima. Mljekara razvija farmerski vid proizvodnje, dakle, ukрупnjavanje posjeda. G. Gligorić je istakao da mljekara ulaže u kvalitet proizvoda. Govorio je o problemu izvoza. Naime, jedan kontingent se izvezio u Hrvatsku, ali opšte je poznat događaj da se početkom februara kamion mlijeka vratio s granice. On je rekao da je potrebno provoditi Zakon o veterinarstvu, a posebno čl. 26. Zakona. On je zatim govorio o potrebi harmonizacije propisa sa propisima EU, a smatra da je gubljenje vremena raspravljanje na kojem nivou treba donijeti zakon ili propis.

G. Vučak predstavio je "Meggle" mljekaru d.o.o. iz Bihaća, članicu Meggle grupe iz Minhena. U ovom momentu mljekara zapošljava 120 ljudi i ima 8.800 kooperanata. Otkup je u prošloj godini iznosio 23, 5 miliona litara, što predstavlja 35-40% kapaciteta mljekare. G. Vučak upozorava na datum 1. 5. 2004. godine kada Slovenija i Mađarska ulaze u Evropsku uniju i posljedice koje će taj događaj imati na tržištu mlijeka. U najveće probleme spada odsustvo statističkih podataka o uvozu, nepovezanost graničnih veterinarskih inspektorata, nepostojanje Zakona o poljoprivredi i institucija za mjerenje kvalitete mlijeka.

G. Peštalić, vlasnik "INMER"-a govorio je o počecima firme, kao porodičnom biznisu, koji se razvijao i sada se otkup vrši na područjima općina Gradačac, Odžak i Gračanica. U glavne probleme ubraja administrativne uvozno-izvozne probleme, neujednačene propise i nebrigu društva oko problema u mljekarstvu.

G. Marijan, direktor "Lura" mljekare govorio je o dugoj tradiciji u proizvodnji tvrdih i polutvrdih sireva, koji se proizvode u fabrici istom tehnologijom kao u cijelom livanjskom kraju, ali na savremeniji način. Kao glavne probleme, uz sve one već pomenute, naveo je tržišne cijene koje mljekare plaćaju za lož ulje, vodu i struju, a koje čine i do 50% troškova.

U nastavku diskusije učestvovali su svi prisutni članovi Komisije i pozvani gosti. Predsjedavajući Komisije je pripremio prijedlog Zaključaka povodom ove tačke Dnevnog reda. Zaključci su podijeljeni svim učesnicima sjednice sa molbom da u roku od 7 dana dostave svoje komentare i prijedloge u cilju njihovog poboljšanja. Članovi Komisije su se dogovorili da Zaključke stave na usvajanje na narednu sjednicu Komisije, a nakon toga će biti upućeni Domu naroda i ostalim nadležnim institucijama u cilju njihovog sprovođenja.

U pauzi nakon ove tačke Dnevnog reda, učesnici su odgovarali na pitanja novinara o ovoj problematici.

## **Ad. 2. Usvajanje Zapisnika sa 14. sjednice Komisije**

Zapisnik sa 14. sjednice Komisije je jednoglasno usvojen.

## **Ad. 3. Saglasnost za ratifikaciju Dodatnog protokola Konvencije protiv dopinga, Varšava 12. septembar 2002. godine - predlagač Predsjedništvo BiH**

U svojstvu predstavnika predlagača o Dodatnom protokolu Konvencije govorio je Mitar Pavić. Nakon toga, Komisija je jednoglasno odlučila da predloži Domu naroda Parlamentarne skupštine BiH da donese odluku o davanju saglasnosti za ratifikaciju Dodatnog protokola Konvencije protiv dopinga.

## **Ad. 4. Saglasnost za ratifikaciju Dodatnog memoranduma o razumjevanju između Evropske zajednice i Bosne i Hercegovine - predlagač Predsjedništvo BiH**

Predsjedavajući Komisije je konstatirao da predstavnik predlagača nije prisutan, iako je blagovremeno upućen poziv predlagaču da prisustvuje sjednici.

Komisija je jednoglasno odlučila da predloži Domu naroda Parlamentarne skupštine BiH da donese odluku o davanju saglasnosti za ratifikaciju Dodatnog memoranduma o razumjevanju između Evropske zajednice i Bosne i Hercegovine.

#### **Ad. 5. Izvještaj o radu Državne regulatorne komisije za električnu energiju BiH u 2003. godini**

O samom Izvještaju kao i o radu Državne regulatorne komisije za električnu energiju govorio je Mirsad Salkić. On je odgovarao i na mnogobrojna pitanja članova Komisije koji su pokazali veliki interes za ovu problematiku.

Nakon diskusije, članovi Komisije su jednoglasno prihvatili Izvještaj i predložili Domu naroda da ga usvoji.

#### **Ad. 6. Tekuća pitanja**

Diskusija nije vođena.

Predsjedavajući Komisije

Hasan Čengić